



**Maleruagassat atuuttut aqputigalugit aalisarnerup aqutsivigineqarnerata allanngortinneratigut Upernaviup aqutsiveqarfiani qaleralittassiissutit tamakkerlugit aalisarneqarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilasortaqaq Aqqaluaq B. Egede, Inuit Ataqtigiit)

(Siullermeerneqarnera)

Demokraatini siunnersuuteqartoq Aqqaluaq B. Egede, IA, qutsavigerusupparput maleruagassat atuuttut aqputigalugit aalisarnerup aqutsivigineqarnerata allanngortinneratigut Upernaviup aqutsiveqarfiani qaleralittassiissutit tamakkerlugit aalisarneqarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuuteqarnera pillugu.

Kalaallit Nunaata suliffinnik isertitassanillu ullut tamaasa annaasaqartarpoq qaleralittassiissutit tamakkerlugit aalisarneqarsinnaanngikkaangata. Taamaattumik Demokraatini siunnersuuteqartoq iluoornerassuarput oqarmat tamman Upernavup aqutsiveqarfiani pisarmat, qaleralittassiissutit tamakkerneqarsinnaasimatinnagit.

Demokraatini isumaqarpugut aalisarnerup iluani niueqatigiinnermi atugassarititaasut atorlugit ineriartorneq naminersortunit ingerlanneqartariaqartoq soorlumi inuutissarsiutini allani taamaareersoq. Demokraatini isumaqarpugut unammilleqatigiinneq atorlugu inuutissarsiutinik ingerlatsinerup pilersuisut atuisartullu iluaquseratai, tassa pineqartumi akulerusimasut tamaasa.

Aalisartut aalisagartaat akigissaarnerussapput aamma atuisartut akikinnerusunik pisisinnaalissapput. Tamatumunnga pissutaavoq sulliviit, tunisassiortut aalisakkanillu niueruteqartartut unammilleqatigiittuartarmata aamma tunisassiornermi aningaasartuutitik pitsanngorsarniartuartarmatigut atuisartut iluaquserumallugit.

Demokraatini qularinngilluinnarparput, pisuussutit - sugaluartulluunniit - tamakkiisumik atorneqarneq ajortut, unammilleqatigiittoqartinnagu.

Taamaattumik ullumikkut Upernavimmi qaleralinnik taamaallaat tunisisoqartarnerata uppernarsarppaa periarfissat tamakkiisumik atorneqanngitsut.

Taamaattumik KNR-mi qarasaasiakkut nutaarsiassanut Polar Seafood A/S-p 2019-mi ukiamiit tunisassiulerniarlutik nalunaaruteqanerata tikilluaqqoqaarput aamma suliffeqarfiup assagiarsunnik qaleralinnillu tunisassiulerniarluni oqarnera.



Demokraatini manna oqallineq iluatsillugu Naalakkersuisut apererusuppagut, suliffeqarfik akuerineqassagaluarpas assagiarsunnik qaleralinnillu tulaassuisalernissaq qaqugu aallartissinnaassanersoq? Paarlattuanillu suliffeqarneq akuersissummik tunineqassanngikkaluarpas Demokraatini paaserusussavarput, akuersissummik tunisinissamut inatsisitigut aporfiit suut pineqarnersut? Inatsisit Upernavimmi unammilleqatigiinnissamut aportitsisimappata, Naalakkersuisunut nassuiaqquneqarpoq tamanna qanoq aningorneqassanersoq?

Demokraatini siunnersuuteqartoq siunnersuuteqartoq qutsavigerusupparput siunnersuulli taama isikkoqarallartillugu ilalersinnaanngilarput, sullivik Upernavimmi pilersinneqalermat, taamaattumik ilisimaqqaartariaqarparput Upernavimmi tunisinermut tamanna qanoq kinguneqassanersoq. Taamaattumik Demokraatini siunnersuut Aalisarnermut Ataatsimiititaliamut ingerlateqqipparput, Demokraatini suliamut tunngatillugu qaqitagut qulaajarneqarniassammata.